

Pest de scoltöra y Trienala Ladina 2013

En chësc ann vëgnel indô invié artistes y artisç da tó pert al Pest artistich de scoltöra Richard Agreiter, y ala Trienala Ladina

Museums - Le Museum Ladin Ćiastel de Tor scrî fora dui concurs por sostignî y fâ conëscë i artisç ladins y les artistes ladines. Al Pest artistich de scoltöra Richard Agreiter 2013 po tó pert düc i artisç y les artistes de scoltöra dl raiun dl Tirol storich (Nord-, Ost- y Südtirol, Trentin y les valades ladines de Badia, Gherdëna, Fascia, Fodom y Ampëz) y la Trienala Ladina é por düc i artisç y les artistes dles cin' valades ladines dles Dolomites, di Grijuns y dl Friül.

Cun chësta scomenciadia déssel gnî valorisé y sostignî la produziun artistica ladina y al ti dess gnî pité a chi che tol pert la poscibilité da se baratè fora a livel cultural y se fâ conëscë a n publich plü ampl. Le Museum Ladin Ćiastel de Tor cun sënta a San Martin de Tor à metü da jî intrami i concurs tl medemo tēmp, mo ai s'adressëia a artistes y artisç desfarënc, y à tematiches desvalies.

Pest Richard Agreiter

Al Pest artistich de scoltöra Richard Agreiter 2013 po tó pert artisç y artistes de scoltöra che laora y é aciasà tl raiun dl Tirol storich (Nord-, Ost- y Südtirol, Trentin y les valades ladines de Badia,

Gherdëna, Fascia, Fodom y Ampëz) y che à n lian particular cun la cultura, la storia y les tradiziuns de chisc raiuns. Chësc concurs vëgn organisé en colauraziun cun l'artist Richard Agreiter; le pest é de 10.000,00€.

Trienala Ladina

Pro la Trienala Ladina 2013 po fâ para i artisç y les artistes che à súa residënza tles cin' valades ladines dles Dolomites (Val Badia, Gherdëna, Fodom, Fascia y Anpezo), ti Grijuns y tl Friül. Al po incë tó pert artisç y artistes che se sënt ladins y che à n lian particular cun la cultura, la storia y les tradiziuns ladines. Chi che tol pert po se presentè cun n'opera realisada te na sort d'ert a plajëi. Les cin' porsones che davagna podarà mēte fora súa opera te na mostra coletiva tl Museum Ladin Ćiastel de Tor.

La documentaziun damanada dala bandida dl concurs é da dè jö cina ai 11 de forà dl 2013, dales 9.00. La daurida dla mostra coletiva "Trienala Ladina 2013" y le conferimënt dl Pest artistich de scoltöra Richard Agreiter 2013 sarà ai 19 de messè dl 2013 dales 18.00, tl Museum Ladin Ćiastel de Tor. (osp)